

E ai ki ngā kōrero tuku iho,
ko te kanae te tuatahi o ngā
tamariki a Tangaroa i puta ora
i te whare o tō rātou matua e
kainga ana e te ahi.

He mea tahu hoki te whare ki
te ahi e Ruatepupuke. I pērā
ai, he kahaki nō Tangaroa i
a Manuhauturuki, te tama a
Ruatepupuke, hei tekoteko mō
tōna whare.

Haere atu ana a Ruatepupuke
ki te tiki i tana tama, tūngia
ana e ia te whare o Tangaroa,
kei roto rā a Tangaroa me
tana whānau e moe ana.

He maha ngā tamariki i
mate, engari i oraiti a Kanae,
whai i muri mai i a ia ko
Maroro, ko Kōkiri. Kātahi ka
tāhaetia e Ruatepupuke ngā
whakairo o mua o te whare, ka
whakahokia mai ki tōna nei ao.

